

元明事類鈔

欽定四庫全書

元明事類鈔卷十九

監察御史姚之駟撰

釋道門

佛

白傘 元史世祖以帝師言于大明殿御座上置白傘

蓋一頂用素綬泥金書梵字于上每歲二月十五日

啟建白傘蓋佛事用諸色儀仗迎引傘蓋周遊皇城

士女聚觀

旃檀像 輟畊錄京師旃檀佛像以靈異著相傳其像無所倚着人君有道則至其國國初時尚可通一線今不然矣帝京景物略鷲峰寺旃檀像高五尺許寒暑晨昏不一色像造自優闐國當佛升天時乃周穆王辛卯至明熹宗丁卯凡二千六百一十餘年

泥金書經 元史順帝時詔以泥金書經一藏

三禪會 元史世祖詔僧人通五大部經者為中選以

有德業者為僧錄等官仍于各路設三學講三禪會
鐵像自移 燕山叢錄香河鐵佛寺舊有鐵佛像高大
餘元至正中佛見夢于僧曰吾緣法不當住此將辭
去僧以鐵鎖鎖佛臂一夕竟移去東光寺獨鎖臂存
至今為僧供養

金佛塔 元史世祖時闍婆國供金佛塔

辟支牙 耶律楚材題佛牙詩殷勤敬禮辟支牙緣在

西菴居士家午夜飛光驚曉月六時騰焰燦朝霞

心佛 宋濂集臨川僧法循常行舫舟三昧示寂後閣
維心獨不化熾火鍛之出五色光視之獲佛像高三
寸非金非石絕類刻成者又有優婆塞得禪觀之法
死後火塋心內色觀自在鸚鵡軍持皆具

塔光 王世貞集京師天寧寺塔可高三十尋四周綴
鐸以萬計恒語不絕至是忽盡斂乃它聲作于下
矧然仰睇相輪表青白光晶濛大于五斛瓮上下閔
剎不定間一射人衣亦作青白色可炊黍熟許時乃

息則鐸聲發它耔耔聲亦息矣

觀音夢 明董穀碧里雜存文皇后在燕邸嘗夢白衣

大士授以經一卷謂之曰汝他日正位中宮誦此可
以禦難夢中誦之覺書之不遺一字命之曰觀音夢
感經自製序文宣入大藏

佛帚 明梵僧鎖喃嚷結記天竺二國答辣寺有佛帚帚
一把乃伽舍草作成長三尺圍七寸帚柄雜寶裝飾

玉石匣盛

年齒當拜 蘇談周文襄撫吳好徜徉梵刹每至佛殿
則膜拜人或笑之文襄曰即以年齒論之彼長蓋二
三千歲豈不直得人拜一二拜也

塔見多影 名山藏成祖往靈谷寺觀向日塔影隨心
所祝見影十一彩雲輪囷寶像週現上大悅曰物影
一而已塔見多影佛道僧法于斯為勝

攝身光 明李逸民集雞足山放光寺見兜羅綿雲緬
出一白宛如玉地大圓光如鏡倚立玉地之上觀者

自見身現鏡中僧呼為攝身光也

塔光迎經 啟崇野乘愁山為報恩寺請藏上命師齋
送寺塔放光累日迎經之日光如浮橋北渡經在塔
光中行

佛現了 暖姝繇筆蛾眉山放光或見七圓光五大二
小一二日前有鳥連叫施主施主數聲後云佛現了
則光見矣

大士女像 談薈大士像飾以婦服前此未聞考宣和

畫譜唐宋名手寫像俱不作婦人凡法苑珠林等記
觀世音顯跡六朝至多其相或沙門或道流或菩薩
無作婦人者惟宋壽涯禪師咏魚籃觀音有金蘭茜
裙諸語然亦其變相耳後世訛為女像又訛為妙莊
玉女尤可笑

空變 帝京景物畧報國寺空變觀音像可尺許寶冠
綠帔瞑而右倚譚元禮贊陶人為陶水火土佐烟銷
空開有觀音座是觀音來匪空也變世化若烟空際

色現

燔佛骨 雲谷卧餘世宗撤大善殿夏言請以佛骨瘞之中野世宗曰今雖埋之將來豈無竊發乃焚之于通衢佛骨佛牙凡一萬三千餘觔

銷金像 明紀事本末嘉靖中黜禁中佛像召李時夏言入視大善殿見金範像不下千百俱命銷燬

天雨抄撮 明雜記洪武四年詔徵江南高僧十人詣京師建法會以薦國殤泰厲帝搢圭面佛樂七奏是

日天雨杪擢子于山中

上佛表 明僧夷簡詩序 洪武五年正月十三日三鼓

上御奉天殿集公侯百官奉上佛表命禮部尚書賈

赴鍾山焚之詩尚書夜待三更漏使者朝持五色雲

求遺經 明太祖以佛書有遺帙命宗泐引徒三十餘人

徃西域求之三年得莊嚴寶王文殊等經還朝姚廣

孝和宗泐使天竺取經回朝詩曇花瑞現傳天界貝

葉文翻進帝宮

浮來佛 明袁易觀浮海石佛詩閣中兩金象竒姿斲

山石當年浮巨海波汎來中國高啟開元寺詩法身
已現浮來佛宗旨曾傳化去僧

雪佛 程本立雪佛碑詩乃瞻白玉相安用黃金飾一
洗熱惱心悉依清淨力

螺髻挿星 王世貞咏大佛詩何來布金地螺髻挿星
辰謂爾原無相憐予亦幻身

母即佛 明李元陽集揚黼讀書養親一日聞蜀有無

際大師悟道因辭親往訪途遇一老僧告之僧曰即無際不如見佛曰佛安在曰汝但回遇着某色衣履者即是佛也遂回數日無遇暮夜至家其母喜甚披衾出戶乃即老僧所言佛狀也自此知父母是佛不用遠慕

呼佛當怒 明世說翟永齡之母日誦佛不輟聲永齡佯呼之母應諾又呼不已母怒曰無事何頻呼也永齡曰吾呼母三四便不悅母日呼佛千萬聲怒當何

如母為少止

未聞佛經 明世說李應貞以中書舍人供奉上命繕
寫佛經李奏曰臣聞凡為天下國家有九經未聞有
佛經者

活佛 明史藁正德時以烏斯藏僧有能知三生者國
人稱之為活佛命中官乘傳往迎糜金錢數十萬不
能致韓邦靖宮女行更寵番僧取活佛似欲清淨超

西天

由教而禪 明僧古溪集入佛之門有二由文字而顯
曰教離文字而悟曰禪泥文字則失之滯畧文字則
失之誕去滯與誕其必由教而禪乎

掇釋腴 唐順之集薛君采喜觀釋氏書謂能一死生
外形骸將掇其腴以求會于吾儒性命之旨

儒釋合 吳偉業集唐宋之講學儒釋分而明之講學
儒釋合憨山蓮池諸大法師皆能融會書傳歸之教
乘

仙

神仙宗伯 元史邱處機自號長春子兒時有相者謂其異日當為神仙宗伯金宋之際俱遣使來召不赴一日語其徒曰天使來召我我當往翊日太祖召者至遂行

仙相 元史類編張留孫少時入龍虎山為道士有道人相之曰神仙宰相也後從天師入朝遂留闕下封大真人位大學士上

焚道書 元史張易言道書惟道德經係老子親著餘皆後人偽撰宜悉焚燬從之

告太平 明太祖周顛仙傳顛人周姓者建昌人因患顛疾凡新官到任必謁而訴之曰告太平後朕帥師取南昌顛者來謁必曰告太平

喚水登舟 異林太宗召張刺達窮其道術張命取水喚于中庭須臾即成巨川岸際橫一舟張舉手招之舟忽近人遂登舟去不知所之尋視庭際杳無波浪

八仙像 王世貞集八仙者鍾離李呂張藍韓曹何也
不知其會所由始余所觀仙跡及圖史詳矣凡元以
前無一筆而明畫手稍有名者亦未嘗及之意或妄
庸畫工取委巷叢俚之說而為之耶

剪紙成舟 卓異記金箔張有道術上召問之曰能頃
刻開蓮花請上御金水橋觀焉張取蓮子撒河中隨
見荷葉競發菡萏齊開張復剪紙作舟吹落河中張
拏舟而登歌採蓮之歌妻子僮僕皆在舟中相與倡

和上大悅忽驟風起人舟荷葉皆不見

留小鼓 獻徵錄張三丰有仙術臨窆復生以小鼓一
腔留寶雞民家雖憂大鏞不能混其身後亦亡去本
朝陳昂滇黔紀遊平越城內有張邈過脩道古迹邈
邊名三丰閩人

投橋出關 類纂鐵冠道人術甚神太祖重之居白下
數年自投大中橋水死太祖令索尸不獲未幾潼關
守奏某月日道人杖策出關計之正其投橋之日也

曇陽 王世貞集曇陽大師姓王氏少好誦佛號忽夢
大士及朱真君吸香烟遂不飯後諸真數至久之能
鍊形出神臨化時曰吾曇鸞菩薩化身也因左手結
印執劍右手握塵尾端立而瞑明王叔承詩曇陽仙
子王家姑幼從節烈參虛無七年服氣絕烟火玉樓
明月寒冰壺

仙諭 明楊儀異纂程濟朝邑人有仙術嘗為四川岳
池教諭相去數千里旦暮寢食未嘗離家而日治岳

池事不廢

從十洲來 李日華集人說黃子久年九十餘碧瞳丹
頰一日于虎跑同客立石上忽雲霧湧溢片時竟不
見子久以為仙去予繙道藏見公望編錄者非一其
師則金蓬頭友則莫月鼎冷起敬張三丰乃知此老
原從十洲來

達夫訪客 羅達夫沒人言其仙去不死或見之燕齊
海上云蜀人馬生恢怪士也于京口語余曰念菴先

生數千里訪公得無相失乎余歸問之果有西江老人衣冠甚偉杖策叩門不告姓名而去

懷皮雀 異林張道脩師事胡風子欲密授以五雷法以書置屋上覆瓦中呼道脩曰天將雨急乘屋道脩如其言往胡公曰得乎曰得矣于是能驅風雷如神常懷一皮雀狎小兒每出則小兒群逐之故時人謂之張皮雀

隱瓶 獻徵錄冷謙為協律郎有故人貧甚知謙有異

術求濟謙曰吾指汝一所有贏金二錠可資但勿過
取迺于壁間畫一門一鶴守之令其人敲門門忽自
開竟恣取以出而不覺遺其引他日內庫失金吏獲
引執其人詞連及謙謙將至城門謂逮者曰吾死矣
安得少水以濟渴守者以瓶汲水與之謙遽以足入
瓶中其身漸隱守者遂携瓶至御前問之輒于瓶中
奏對上怒碎其瓶片片皆應

法鐘齊發 異林雷蓬頭者名太雲成化間居太和山

敝衣蓬首行若飄雲倏忽數十里山中祠宮成固鎖
鑰每雞鳴諸山法鐘遠近俱發道士驚起曰雷仙人
入宮矣

噉擔瓜 獻徵錄尹蓬頭入市適賣瓜擔停焉人戲曰
公能盡此一擔瓜乎曰能即買而饋之噉瓜立盡

祭碑 遜國記徐州之捷諸將樹碑敘戰功及統軍者
姓名程濟一夜潛往祭碑人莫測所以後文皇過徐
見碑大怒趣左右推碑再推遽止曰為我錄碑文來

金匱四庫全書
卷十九
已而按碑族諸將濟名正當推處得免

虞臯宴客 明雜記虞臯羅源人常為道士所辱故人
木當敏背之去尋入羅喜洞望見玉堂金闕麗人百
數臯至皆前迎有頃宴客坐當敏于堂下居十日辭
歸城郭人民盡非昔日蓋洪武之十二年矣

月府侍書 啟宗野乘鄭公子曾脩玉京女史時月府
侍書寒簧聞之于其讀書樓下花架中一現天仙女
身此天順二年事後鄭公子托生張姓寒簧謫為葉

工部女名小鸞方締姻好便爾長逝小鸞仍隸仙籍
焉

英雄為仙 彭仙翁幼朔嘗語余近有人入青城山中
見老人跨白鹿曰我三國徐庶也世寧有英雄不為
神仙者乎

通名紙 異纂劉知府偉好神仙比死命無葬我其甥
韓邦奇宦山西忽聞人持名紙入報韓驚起命延入
戴古毡笠青絹袍一童子扶之入坐無異平生手接

茶而不飲語及家事頗作悲泣之狀別去令人踪跡之至一遠寺中止明日訪之去矣劉氏聞之發棺視惟一冠在焉

左手常握 山東通志海上一老人髮如銀絲顏如渥赭左手常握而不開日進生果三枚水一勺而已生元至正甲辰至明成化癸卯涉一百二十餘歲濟南衛指揮奏其事賜名王士能

袖中兩橘 獻徵錄尹蓬頭館魏國家嘗偃大棹晝睡

寤而語魏國曰適遊姑蘇洞庭山而返魏國不信即
出袖中雙橘其時南都尚未有也

箕仙 名世類苑世宗信任箕仙勅建承天閣以奉之
吏部尚書熊浹言箕仙不足崇信上怒黜為民

青詞 明紀事本末夏言與嚴嵩俱以青詞得幸言老
倦令幕客具草每多舊所進者上輒抵之地嵩聞益
精其事上愈幸嵩

僧

步行水面 談薈元時黃衣和尚每渡津即步行水面
衣履不濕遇虎豹輒叱之而馭

帝師 元史世祖以梵僧帕克斯巴為帝師授以玉印
統釋教

數珠愈疾 元史允丹嘉勒燦妻得竒疾國師丹巴以所
持數珠加其身立愈

並驅高躔 元歐陽詹為蒲菴集序由唐至宋大覺璉
公明教嵩公覺範洪公宏詞妙論人盡嘆服元初若

天隱至公晦機熙公倡斯文于東南一洗咸淳之陋
晦機之徒笑隱訴公尤為雄傑後見心復公以敏悟
之資發為詞章即卓然並驅于嵩璉諸師無愧也

咒食龍湫

元史丹巴習梵秘法禱雨立應又嘗咒食

投龍湫久之竒花異果上尊湧出波面取以上進

聰書記

元史劉秉忠初從釋氏名子聰世祖愛之雖

居左右而猶不改舊服人稱之為聰書記後位太保
延徽爾 元史順帝時西天僧進房中運氣之術號延

金定四庫全書
卷十九
徹爾法帝又習西番僧秘密法

梵孫

姚燧集佛遊悠久其言斯存孰為其言百世梵

孫

羊皮牒

湧幢小品元時僧度牒以羊皮為之

不入僧座

元史虞槃以兄集喜接方外士聞諸僧在

坐輒不入竟去

立聽詔旨

耶律楚材集萬松老人住持仰嶠章廟入

山屢重顧問翌日遣賜錢二百萬使者傳勅命師跪

聽師曰出家兒安有此例竟焚香立聽詔旨

卓衲 元方回詩敲月會碁迎卓衲

懷探玉龍 僧園西域僧班廸達與真人張宇皆侍高

皇令二人較術曰聞西域某國有玉龍可取之真人

受詔作法的達止盂水置前跏坐而已踰六日不至

宇以的達破其術帝令解之廸達取盂水瀉于地有

頃諸神報曰取得玉龍行抵流沙忽洪濤漲天六日

水退始得渡而玉龍竟沉于沙中帝不悅廸達便從

懷中取出以獻

焚身救僧 剪勝野聞洪武中下度僧之令僧至者三
千餘人中有冒名代請者上悉命戮之吳僧永隆請
焚身以救帝允之至雨花臺秉炬自焚骸骨不倒異
香逼人羣鶴舞于龕頂上乃宥三千人

役木球 李東陽集宣德中板菴禪師能役木球大如
斗轉輪行馳登下委折如目脛具逢人躍躍如首稽
叩師曰入某門則入募金若干宣宗召入命為木球

使者施金錢遂建巨刹曰功德寺

雪中紅光 宋濂集壁峰禪師在五臺順帝召之冬夕

大雪有紅光自師空室中起上接霄漢帝驚歎賜以
金紋伽黎衣

泐秀才 傳信錄泐公好儒帝呼以泐秀才

拂子趕蠅 明高僧傳雪公將示寂坐高齋俛見擔糞
者過其下呼至授以拂子曰拿去趕蒼蠅

設燈懺詛 今言靖難兵起南州法師博洽設藥師燈

懺詛長陵金川門開又為建文君雜髮長陵聞其事
囚之十餘年姚榮靖疾問所欲言于榻上叩首曰博
洽繫獄久矣上即日釋之

乞施剝韻 明陸儼山詩話國初越中詩人遊曹娥祠
一僧敝衣坐船尾衆方分韻賦詩殊不之顧忽作禮
云有剝韻乞布施一個衆拈蕉字與之即應聲賦七
律一章末云西北陰沉天欲雨卧聽蓬韻學芭蕉衆
驚曰公非雷夢堂乎遂邀入社

諷經虎溪 西湖志蓮池師見雲栖山水幽寂有終焉
之志環山多虎患師發悲懇諷經施食虎遂遠徙

宣偈送葬 徐禎卿野聞馬后葬日大風雨雷電帝不

樂召僧宗泐至命宣偈泐應聲曰雨落天流淚雷鳴
地舉哀西方諸佛子同送馬如來帝大悅

不付弟子 明高僧傳雪公造詣淵微與天童同為禹
門法嗣天童以巾拂付弟子十二人再傳登獅座者
多至六百七十八人雪公終身不付一弟子

釋三負 明高僧傳紫柏師聞憨山被難聞人督礦橫
行乃決策入都謂人曰海印不歸我為法一大負礦
稅不止我救世一大負傳燈錄不續我慧命一大負
捨此一具貧骨釋此三負不復走王舍城矣

真護法 明僧祿宏尺牘佛法外護付與王臣但今之
護法有矯枉過正者遂令緇侶樂于菴居蒼生哭于
郊野豈不可傷願居士以忠君愛民為正務次乃及
于護法是謂之真護法

行其雲臥山水幽寂

魚聲達宮 隴蜀餘聞明無壞禪師西域人與秦愍王
有宿緣木魚聲達王宮異之往見與語恍然悟前生
事師携石甑炊飯石瓶煮水飲食從者遍千人

三軍法侶 愍山戍雷陽赭衣見大師乃構丈室于行
間以金鼓為鐘磬以旗幟為幢幡以刀斗為鉢盂以
三軍為法軍以參謁為禮拜

食肉止殺 吳偉業綏寇紀畧張獻忠殺人之多較黃
巢百倍破山和尚嘗勸賊止殺賊以羊豕進曰和尚

食此吾當封刃破山遂食之

拄杖打狗 明高僧傳雪公手携藤杖甚奇古或見之
以為難得公笑曰小大魔王動以拄杖拂子付人十
年之後此物不中打狗

少林棍 明李本寧題少林演真圖程宗猷受少林棍
法彙之成帙有圖有訣相傳寺僧于隋唐間力能拒
賊至勝國時費下僧奮神棍火中以却紅巾而刺麻
師益拘討之國家有征討往往召僧奏効名益著矣

如鷲 嘉靖注畧僧天圓講楞嚴于天池山蘇州撫臣
知其武召之出募遊僧八十人製衣內皮外竹甲造
鎗鈎鐵挺諸仗每戰為官兵前行或俟諸軍戰酣羣
僧躍擊如鷲倭賊畏之

如妓 陳仁錫焦山塔記金山僧如妓廬如市

釋燄 明董石林題唐義士傳後釋燄薰天墨毒殘骨
唐進士忠憤激發拔遊魂于獸罾之中

臨濟兒孫 法幢日倒魔民師子妄稱臨濟兒孫互相

尊奉

華云 揚慎感通寺詩傳燈留聖製演梵聽華云自注
洪武中賜寺僧詔云衆僧經通佛旨語善華云華云
猶華言也

呂尼跌逝 帝京景物畧英宗親征也先陝西呂尼迎
駕諫曰不利上怒叱武士交捶尼跌坐以逝及蒙塵
時數見尼或授上餅餌駕返居南宮亦數數見復辟
後詔封皇姑建寺後殿祀姑肉身

道士

七真 詩話元時道教特盛所稱邱劉譚馬郝王孫七
真者大半有集

虎徙 元史張志清傳道制行堅峻東海珠牢山舊多
虎志清往結茅居之虎皆避徙然頗為人害志清曰
是吾奪其所也遂去之

句曲外史 張雨傳雨字伯雨年二十棄家為道士王
真人偕之入京璽書賜驛傳欲官之自誓不更出往

金定四庫全書
卷十九
來華陽雲石間世稱句曲外史

廿年不睡 劉因九日登洪崖詩况有幽栖人嗒然空
隱几自注有道士居此今二十年不睡矣

呵屍 志怪錄葉宗可元末避兵淮陽晝伏夜行倦卧
地上雜衆屍中夜分月明見一道士偕一童子以燭
燭羣屍凡老幼羸尪者俱不顧得一壯男子道士視
之有喜色即解衣與之合體相抱持對口呵氣良久
道士氣漸微屍冉冉動俄而欠伸又開眼遂推道士

于地蹶然而起仍令童子執燭而去

作符篆

元史張伯雨謁虞伯生虞問能作幾家符篆

乎荅曰未也虞連書七十二家示之伯雨下拜曰真吾師也

劍印相傳

元史世祖遣使召天師三十六代宗演命

取其所傳玉印寶劍觀之語侍臣曰朝代更易不知其幾而此印劍傳子若孫至今豈非神相

天師世家

宋濂集嗣漢四十二代天師張真人以世

家一卷徵序于予蓋文成侯九傳而生漢天師道陵
是為元教之宗歷千二百有餘歲而至今天師秩視

二品

噓氣成煖 異纂蔡敞好神仙嘗有一道士來謁偶命
一童子去席百步解衣而立時方隆冬道士遙吐氣
噓之即汗出淋漓煖如盛夏既而口出風吹之寒氣
襲人便欲僵卧敞曰庭中瓦礫山積君能除之乎曰
易耳即令閉門盡屏侍從但聞人馬聲瞬息聲止開

視之階砌如掃矣

化金蛇 尊鄉贅筆彭通微母夢一黃冠食以大桃而有娠及長傳太和張真人鍊氣之術居細林山中明太祖召之值其羽化命啟毳視之正坐不倚長爪繞身其爪甲隨風而化變為金蛇或藏之器中倏去不見

劾狐 啟崇野乘萬安禮好道習符法人有為狐媚者延往劾之狐盛車騎迎入雜然相詆訶安禮乃握掌

默運雷訣須臾雷震狐死樹下

符錄幸 嘉靖注畧龍虎山道流邵元節以符錄幸曰
致一真人仕至尚書

祝生老人 異人祝萬春決楊漣必為大器漣少時疾
將屬續祝視之大呼揚二者三唇微張乃出藥一粒
啟其齒下之氣息惛惛夜分而甦人皆曰祝老能生
死人也

方術尚書 嘉靖注畧陶仲文為庫大使以方術召見

仕至禮部尚書加少保明唐時升過陶真人故居詩
世皇中歲好神仙方士承恩玉几前

鍊師禱雨 高啟贈鍊師禱雨詩當年服侍茅長君能
役鬼神呼風雲下為群生掃旱沴雨工驅起如羊羣
金籙大齋 明紀事本末嘉靖中命建金籙大齋于內
皇壇白鶴遠壇卿雲捧日賞天師張彥紳有加

丹侶 何景明天壇沈道士觀中詩洞口逢丹侶花間

醉碧簫

寺觀

集慶寺 虞集碑銘皇帝自金陵入正大統以金陵為
集慶路遣使以潛宮之舊作大龍翔集慶寺銘曰我
即我宮作祠奕奕照汝淨月沐汝甘澤

報恩寺 程鉅夫報恩寺銘彤雲承雷翠霧凝柯天花
夕雨貝葉晨哦湧幢小品南京報恩寺有琉璃塔及
殿屋皆莊嚴雄偉蓋悉成祖宣廟財力成此

延慶寺 姚燧集安西王請即六盤興慶池園為寺用

資兩聖冥福案華嶽實王封內嶽祠之門揭為宣釐
則表寺之名莫延釐為宜

西山寺 郝敬西山絕句西山三百寺十日徧經行歸
與家人語山多不記名辛齋詩話西山巖麓無處非
寺王子衡詩西山三百七十寺正德年中內臣作何
仲默詩先朝四百寺秋日徧題名鄭繼之詩西山五
百寺多傍北邙成

華巖寺 袁桷華巖寺銘魏煌華巖窮珍極瑰龍伏漦

井雲凝瑤臺

五臺山寺 筆塵五臺山寺元太后宏吉刺氏所造剎
寺之役民夫伐木運石死者萬人

慈仁寺 排悶錄慈仁寺本為周太后弟吉祥建而寺

碑只云為太后祝釐蓋諱其事至歸熙甫作記始詳
言之寺建于報國寺之東南都人至今日為報國寺

塔變紅 元史元統中彰德路天寧寺塔忽變紅色表
裡透徹如煨鐵初出于爐頂上光焰迸發先是河北

有童謠云塔兒黑北人作主南人客塔兒紅朱衣人
作主人公

禮拜寺 明史稿天方重回回教國有禮拜寺共三百

六十間皆白玉為柱黃甘玉為地其堂以五色石砌
成沉香大木為梁凡五又以黃金為閣垣墉悉以蕃
薇露龍涎香和土為之守門以二黑獅鄭和使西洋
傳其制如此

臨濟寺 元好問遊龍泉寺詩庭樹老于臨濟寺霜林

金匱四庫全書
卷十九
渾是漢家營

秋水觀 虞集秋水觀詩湖深天影碧天淨月光空幸
自無波浪蘋花滿晚風

先天觀 余闕先天觀詩仙客鍊金地蒼山深幾重至
今龍虎氣猶在琵琶峰

延祥觀 盤陰雜誌延祥觀初名元寶觀至元中邱長
春過此觀有枯柏捫之復榮

紫陽菴 薩天錫贈吳山女道士詩序吳山紫陽菴丁

姓者棄俗為全真一日忽召其妻出詩云嬾散六十
三妙用無人識順逆兩俱忘虛空鎮長寂抱膝而逝
尸堂尚存其妻王守真亦束髮為女道士奉夫尸不
下山二十年西湖志紫陽菴元至元間建丁號野鶴
王世貞紫陽菴詩解道丁家留鶴蛻至今華表未聞
歸

白雲觀 帝京景物畧白雲觀太極宮故墟中塑長春
邱真人像都人正月十九致漿祠下相傳是日真人

必來王世貞遊白雲觀詩行散到古院翛然遇真師
落日淡眉宇清霜踈髻絲

大素宮

登齊雲巖詩先帝祈年盼蠻聞紫壇絳節正

氤氳金莖直上虛危位銀榜親書天地文自注大素
宮是也世廟禱祀所建

梵樓 楊維禎承天閣詩荆棘荒涼繞舊宮梵樓突兀
畫圖中

栖雲 宋濂棲雲室記中峰本禪師結廬姑蘇城西趙

文敏書其扁曰栖雲中峰之孫用菴作新室于故址
復取故名揭之

塔燈 李本寧報恩寺塔燈詩鳳刹勢參天花步步
蓮火從三昧入燈向十方傳

天寧寺 帝京景物畧天寧寺塔藏釋迦舍利珠高十
三尋何景明天寧寺塔詩七級芙蓉起千年舍利藏
地形標海嶽人代閱隋唐

功德寺 李夢陽功德寺詩宣宗昔遊幸遊戲玉泉傍

立宇表巖嶽開池荷芰香

皇覺寺 泳化編太祖微時托身濠州皇覺寺

元武金殿 卓異記靖難兵起南軍遙見空中真武二字旗幟皆攻後以北既正大統遣使于武當山營元武宮殿楮柱甃甃悉用黃金一時天下金幾盡明成祖御製太和山碑太和山神陰翊顯佑靈赫奕肆今建玉虛宮天柱之巔冶銅為殿飾以金泥

元明事類鈔卷十九

欽定四庫全書

元明事類鈔卷二十

監察御史姚之駟撰

神鬼門

神靈

天妃 元史南海女神靈惠夫人至元中以護海運有

奇應加封天妃歲遣使致祭袁凱天妃廟詩百年祀

事崇邦典半夜神光出海濤

頸涌白液 元史類編王伯顏知福寧罵賊死頸涌白
液如乳後賊時覩其引兵出入明年我兵討賊望空
呼王州尹乃見陰兵相助

元武石 宋濂集吳興林君靜事元武神夜夢羽客遲
遊鰲峰翌日往逢龜蛇出洞中已而不見因刷地獲
圓石有元武像黃帕按劍坐雲中龜蛇在下衣如淡
金色背文外為墨緣其色正白所現之形毫末備悉
廟移 文林漫抄高皇生于靈跡鄉土地廟相傳生時

夜晦惟廟有火光明日廟移至東路至今其地丈許
不生草

惠墨一擔 祝允明集唐子畏性絕穎利嘗乞夢仙遊
九鯉神慶惠之墨一擔蓋終以文墨傳焉

司土供地 徐禎卿集太祖微行有監生某者入酒坊
帝與之入時座客滿案惟供司土神几尚餘空帝携
之在地曰神姑讓我乃與生對飲次日召見除官秣
陵民家至今供土神于地也

鄧都獄 祝允明語怪鄧都觀香火甚盛永樂間江西
尤和為令意欲除之一日門子忽倚其靴而僵越二
日始甦云方走無常始回耳問其所攝則即令之弟
也扣其室廬相貌無不合者命人訊于家弟果亡乃
入觀醮謝紀其事而鑱之石

廟徧天下 元李俊民關將軍廟詩曹吳不是中原手
天下英雄有使君明錢福集義勇武安王關公廟祀
徧天下端人正士義其忠武夫勁節壯其勇田畯村

媪攝其神

巨人大言 王守仁年譜壬子先生試于鄉時聞中夜半見二巨人衣緋綠東西立大言曰三人好作事已而先生與孫中丞燧胡尚書世寧同舉及宸濠之變胡發其奸孫死其難先生平之

桑將軍 獻徵錄戚編脩瀾嘗渡錢塘風濤大作有絳紗燈數百照江通明丈夫九人乘白馬飛馳水面公推窻看之九人皆下馬跪問曰若輩非桑將軍九弟

兄耶曰然曰去吾喻矣公遂反棹謂家人曰某日吾逝矣及期沐浴朝服坐九人率甲士來迎踐屋瓦皆碎有頃公卒

藤像 帝京景物畧顯靈宮祀王靈官神相傳靈官藤像文皇獲之東海崇禮朝夕所征必載及金川河昇不可動就禮而秘問之曰上帝有界止此也明李言恭顯靈宮詩殿中香火儀猶具海上仙人事轉疑

九蓮菩薩 玉堂薈記九蓮菩薩者孝定后夢中授經

者也覺而一字不遺因錄入大藏中旋作慈壽寺內
塑像跨一鳳而九首寺僧相傳菩薩為孝定前身

樹中神像 典故紀聞雲南普寧州有大樹頗靈後大

風折樹鋸之中有神像戴冠執簡容貌如畫因立祠
以祀

旌旗蔽天 名臣錄成祖起兵問少師姚公師期曰未
也俟吾師及祭纛見披髮而旌旗者蔽天問公何神
曰向固言之吾師北方之將元武也于是成祖即披

髮仗劍相應焉

龍王 明神宗畫眉山龍王廟詩序廟在都城西一舍地故有泉潭相傳為龍所居即其旁建廟焉禱雨輒應

州西寺 李夢陽集黃紱為四川叅政過宗岡忽旋風起輿前公曰是有寃禱之城隍夢中若有人言州西寺云公密訪之果有寺倚山為寨抵寺見一人狀甚惡鞫之盜也并暴諸僧奸狀遂毀其寺

鸚鵡神 徵吾錄寘璠將叛現王九兒降鸚鵡神妄言
禍福每見寘璠輒呼老子

神人呼 解縉永樂歌詞序有老父羽衣至神樂觀大

呼萬歲者三已而忽不見迺知其神人也作神人呼

伽藍告 帝京景物畧報國寺碑記云英宗周后弟幼

祝髮晝遊市陌夜宿寺之伽藍殿英宗忽夢伽藍神

來告后弟今在某所后夢亦同即日求得之后弟仍

願為僧乃改報國寺為慈仁寺

金定四庫全書
卷二十
濟瀆貸 語怪濟瀆祠前有大池欲假金者先以玦禱
神許則投券池中良久有銀浮出如數貸者持去如
期具子本祭謝而投之銀沒而原券浮也

碑石自立 明潘壘集劉安宰南宮邑有李陽冰祠祠
頽碑高丈餘且仆公祈雨至祠下告神曰如神有靈
碑自立當新其祠翌日雷雨大作四野霑足碑且起
立公具其事上聞

問孔老人 異林文太守在溫州遣人至九仙山祈問

壽算夢中人云有孔老人還自問之至郡以白守搜
訪果有此人昨被差遣將一大木付鋸因召問曰此
木合鋸幾何對曰合得板五十有六中腐其一數不
全耳守時年五十有五聞言驚汗明年卒

紫姑詩 泳化編朱原虛有弟二人皆幼遂匿父所遺

綾錦二弟皆至貧乏一日請紫姑仙乞詩仙降云何
處西風夜捲霜雁行中斷各淒涼吳綾越錦成私篋
不及姜家布被香原虛大慚即召還二弟

金定四庫全書
卷二十
碧霞君 董其昌望岱詩何當馳匹練高揖碧霞君

子路擊 明紀事本末有張生者欲上疏以忠賢與孔

子並尊入國學忽稱見子路擊之遽殂

城隍禮佛 帝京景物畧萬厯時驚峰僧在殿誦經一

士子禮拜墀下僧覩儀觀有異乃迎上殿士固不可

因通曰城隍也殿有戒神呵護我小神敢輕入語罷

不見

花神邀飲 明詩話閩人鄭琰客西寧侯所畫夢黃衣

少年邀至廡下共飲少焉一麗人至起舞歌春遊之
曲飲正歡駭曰文羗校尉來矣見一人綠袍張目至
前遂罷席而寤就視庭中牡丹一花映日一黃蝶一
螳螂而已

判官閱籍 名世類苑商輅會試累不第乙丑載試夢
至嶽祠祈問利否嶽神目判官閱籍云皆在首商喜
趨出遂寤後果然

汗如珠 湧幢小品安吉州李衛公廟宏治初歲旱邑

金定四庫全書
卷二十
令輿神禱雨雨隨輿至後又旱且酷熱禱于神神額
有汗如珠拭之復汗雨亦隨應

拔木積廟 崔銑集石璞開藩山西議脩堯廟一夕大
風拔木積廟前皆棟梁材

山神震吼 沂陽日記江彬導武皇宿牛首山三日彬
欲行異志而山神震吼達曙不敢舉事

貶土地 西樵野記吳文定少就某師學偕友詣土地
祠戲書神座云土地無道貶三千里其夜神見夢于

師曰從者無過見謔然天曹筆也真為我釋之某師
起訪諸其徒得匏翁焉乃命洗滌之後文定官吏部
侍郎

日中紅衣 獻實周新死西市後數日或見形于朝又
或見一人衣紅衣立日中不甚可辨上問為誰對曰
臣周某也上帝以臣剛直命為浙江城隍矣言已不
見

牲筵犒軍 汪道昆集戚將軍繼光提兵過萊山萊山

其上祠秦始所封日主未及一舍一嫗伏謁馬前請
犒從事問其故嫗自言嫗子病禱於祠陳牲二筵夜
夢神謂曰朝有孝廉將軍至願持此為餉故敢逆軍
吏耳

金龍王 湧幢小品金龍大王姓謝名緒隱居金龍山
聞元兵入臨安赴江死尸僵不壞明兵起神示夢佑
戰輒勝後鑿會通渠于呂梁洪舟過者禱無不應于
是建祠洪上潘季馴治河時屢著靈應祇事益虔

夢羽士 徐禎卿野聞常遇春初附劉聚嘗晝寢夢一
羽士語之曰起起此處非爾所托爾主至矣既寤適
太祖至遂傾心焉

如豕者七 蘇談徐武功下詔獄日默誦斗母咒迨獄
且論決而風雷大作承天門鷗吻落暝晦中有見錦
衣堂上有物如豕者七蹲焉蓋斗神所為也

漁翁引兵 功臣錄湯襄武征福建從海道進兵遇漁
翁面藍色操舟就之曰子弗殺人吾指子路應曰諾

遂潛兵直抵城下全城降附視昔之漁翁乃南臺太廟殿神也

五聖 觚騰明祖定天下大封功臣夢兵卒千萬拜殿前曰我輩沒于行陣請加恩卹高皇曰汝固多人無從稽考姓氏但五人為伍處處血食足矣因命江南人家立尺五小廟祀之俗稱五聖祠

焚香灰結 王世貞集劉大夏治張秋河決祀河神而所焚帛灰結若人形物議洵洵大夏不為動乃䟽上

流之壅而別河張秋之南以通運艘河就馴

猿仙神 湧幢小品韓苑洛為浙江僉事以誣被逮時

山東魯橋有猿仙神能言禍福官校謁神神曰汝輩
非拿韓僉事者乎韓大好官無人不惜其枉異日且
大用爾輩可謹事之衆自是待韓愈恭

天妃送風 楚記羅文肅玘未遇時嘗在舟中病篤忽
聞人呼天妃至遂張目視之覺舟之箬篷墜下如輶
足之垂一婦人呼曰此中一有學之士病在孤旅如

金定四庫全書
卷二十
何無一人救護我送他一陣好風言畢轎足舉起頓
覺身顫汗出而漸甦

伽藍呵責 李日華集唐伯虎讀書山寺偶推村犬拾
佛廬中木位作薪煮啖之隣寓一措大亦分啖數纒
措大歸即病為鬼語呵責曰我寺之伽藍神也措大
辯曰事由唐寅神曰唐寅則可汝何人敢效之耶

書牌封劍 明史葉熊廷弼按遼東歲大旱行部金州
禱城隍神約七日雨不雨毀其廟踰期乃大書白牌

封劍使使往斬之未至風雷大作雨如注遠人以為
神

曇鸞降闈 虞長孺一生多仙靈冥感已如鎖闈寐而
腕書六義醒以意足之為舉子曇鸞降焉以所挾行
卷焚之俄而完楮飛回上有紫粉批絕細

天主女圖 明紀事本末利瑪竇貢方物禮部言大西
洋不載會典而所貢天主女圖又屬不經勿宜令住

京師

金苑四庫全書
卷二十
死作閻羅 繪園陳用賓撫黔夫人病劇以三月十六
日設壇召乩乩至自稱金碧山神問病可救乎曰常
熟春官侍郎趙公用賢新為五殿閻羅十五日蒞任
法甚嚴峻無路可救矣越三閱月知侍郎果以是日
捐館萬里之遙一日而神已知異哉

靈真位業 明曹士龍玉海詩記天上靈真位業一十
九位太保萬楚中岳陶潛南岳杜甫西源大帝王羲
之巡王四大洲謝安左館玉書蘇子瞻西溟星君莊

定山太極殿大學士李于鱗其可知者也

刺謁夢中

謝肇淛集練中丞闔門荼毒有侍媵抱匣

歲子匿民間展轉入閩為傭六世孫綺為陳孝廉書
記江右楊生同舟先一夕夢練公持刺謁已心異之
比見書記侍側問何姓荅曰姓練生扣之具得其狀
歸白當事聘之授以衣巾俾奉公祠

授仙篆

魏禧集萬厯時孝子吳紹宗以父病自投太

華山捨身崖代死投訖立空不墜足下白雲起遙見

石門上一大孝字有神人命之曰孝子吾左側石有
仙篆九十二畫汝記歸書紙食汝父不獨却疾且延
年孝子叩謝畢身已在殿上急歸如言後果然

夢報風濤

弇州史料邱文莊夫人嘗過鄱陽湖夜夢

達官呵擁入舟曰吾編脩戚瀾也昔與邱先生同官
誼不容絕特報爾三日後有風濤可亟遷于岸夫人
驚覺如其言移于寺中未幾果有風濤衆舟盡溺至
京夫人白其事于公公以聞于朝遣官諭祭

掃晴婦 李俊民集世俗為掃晴婦者蓋假燮理之手
使民免乾燠之患也感其事而賦之明王彥泓竹枝
風雨元宵意倍傷畫檐低拜掃晴孃

鬼物

貞魂求書 趙孟頫集巴陵韓氏魏公五世孫嫁董瓊
岳州破被虜以衣帛書詩自投于江詩傳人間長興
判官托劉光履求書此詩傳世劉諾而未言一夕夢
一婦人云趣為我求書庶因大人君子之筆發揚幽

憤余聞為寫一道

人皮詛 談薈元世祖誅阿哈瑪特籍其家得二熟人皮

于櫃中兩耳俱存云詛咒時置神座上其應如響

蘇小和詩 楊儀雜錄西陵蘇小小墓處也詩人馬浩

瀾遊西湖首倡長律明日再遊坐中有客扶乩浩瀾

以前詩請和運乩如飛詩畢曰錢唐蘇小小和馬先

生昨日湖頭原倡

玉香吟詩 明詩話成化中閩林景清戀妓楊玉香既

別而玉香天林泊舟白沙則玉香夜至有詩相酬和
及過金陵訪之則死已一月矣是夜獨宿見玉香從
帳中出吟詩末云從前為雨為雲處總是襄王一夢

中

避景秀才 遜國記景清赴舉宿旅主家主家有女為
妖所憑是夜清在而妖不來女詰之曰避景秀才也
女父告清清乃為書景清在此四字令粘其門妖遂

絕

金定四庫全書
卷二十
耗紙鬼 明詩話劉溥為廷美題終南進士詩廷美懸
之堂上次日賀客正至競裂門籍紙傳寫廷美曰此
馘乃耗紙鬼也

鬼兵 庚巳編陸容居吳之婁門外正德丙寅春一日
晚聞隔岸洶洶有兵甲聲已而有數千百人自腰以
下可見皆花繒纏股其行甚疾呼家人出皆見之是
歲海寇起蓋兵象也

詩魂夜訪 才鬼記吳人竹溪翁嘗讀書山中夜半有

鬼扣其門其人不取納鬼誦詩云墓頭古樹號秋風
墓底幽人萬慮空獨有詩魂消不得夜深來訪竹溪
翁

鬼聲戢戢 獻徵錄蔣欽為御史偕同官十三人劾逆

瑾屬草燈下聞鬼聲戢戢自念此鳴者將非先人之

靈懼覆後嗣欲泥吾事乎俄而聲振四壁欽嘆曰使

緘默負國為先人羞亦均于不孝矣因奮筆曰死即

死耳不可易也聲遂止䟽上被杖而卒

金定四庫全書
卷二十
黑青 典故紀聞正德七年黑青見形兼赤黑大者如
犬小者如猫風行有聲夜出傷人有死者震澤長語
先是黑青見未幾立西廠使汪直偵外事大臣多被
戮辱人以為其應也

婉娥贈詩

明詩話吳江沈韶洪武中汎舟九江登琵琶

亭月下聞歌聲明日復往有麗人來呼韶並坐曰
妾偽漢主婕妤鄭婉娥也死殯亭側因口占一律贈
韶且命侍兒鈿蟬取酒韶與留連半載臨別以金跳

脫為贈

疫無鬼 王世貞集楊繼盛少讀書僧寺諸僧病疫同
舍生皆亡去繼盛為調藥餌而愈而公兄亦病因奔
歸日夜扶持亦愈時人為之語曰疫無鬼以為不信
視楊氏子

大小青 湧幢小品陸道判遊姑蘇假一廢宅多崇夜
坐有二女笑語于前陸叱之荅曰妾乃大青小青也
言訖躍出陸飛劍擊之早視劍處有大小冬青二樹

金定四庫全書
卷二十
因斧之啟下一石板黃白數罌後贅沈氏生萬三為
江南富族之甲

大將題壁 程敏政集湯公讓戰死延綏後邊人見一
大將盛服鼓吹擁衆宿郵舍質明而去壁上詩有血
污游魂歸不得幽冥空作望鄉臺之句見者知為公
手跡也

晚翠亭詩 葉世竒草木子有才鬼作晚翠亭詩云山
深不知秋落葉下枯木須臾翠烟開月色照綵服

紙鬼為奴 宋濂集王萬里以妖術行辱于王弼遣鬼
物害之弼聞鬼晝哭咨之曰我周女名曰月西以母疾
召萬里卜萬里以兒生年月禁架昏迷負至柳林穴
取心肝咒劫精魂使附于紙為奴稍怠則以針刺不
勝痛苦君其為我白諸弼具白于縣急捕伏辜

不近端人 泳化編夏原吉少就里塾每歸夜恍有帶
大笠若土神者護行又郡中有鬼物能白晝報人禍
福惟原吉至鬼輒不言或叩其故曰夏公端人吾不

可近

人頭入宮 皇甫庸紀畧建文時新宮初成見男子提
一人頭血色模糊直入宮中大索不得夜宴張燈忽
不見人

委鬼當朝 明紀事本末魏忠賢初直東宮有道人宿
朝天宮日歌市中曰委鬼當朝立茄花滿地紅蓋指
客魏也後果驗

仙箕題詩 才鬼記嘗有召仙請作梅花詩仙箕遂寫

玉質亭亭清且幽其人云要紅梅者即承云着此顏色點枝頭牧童睡起矇矓眼誤認桃林去放牛又一箕題雞冠詩亦如此改其詩云雞冠本是胭脂染洗去胭脂似雪粧只為五更貪報曉至今猶帶一頭霜蟲齧成字明詩話萬厯中閩人董槐能文年十七而歿長現形為母護湯藥墓上樹蟲齧成字或螳緣土為字皆成詩句末必書行仙董郎

梭舍人郎瑛續已編梭三舍人者梭纜也太祖御舟

師敗陳友諒于鄱陽湖死者數十萬返還擲梭纜于湖寃魂憑之能溺人舟

避正人

湧幢小品蘭溪北隅一樓章文懿游其上倦

而寐有二鬼來矚驚曰章大人在此奈何一欲避去一曰奉命洒掃候北斗使者如何可違公隱隱聞之聲漸遠乃起後一醫士夢一鬼兩股流血泣曰不避正人為王者所撻乞藥傳瘡

掩骸定情

明詩話嘉靖中福清韓夢雲過石湖山見

遺骸哀而掩之是夜見一麗人拜燈下曰妾王秋英
元至正間從父之官遇寇投崖死荷君子惠及骸骨
亦夙世緣也遂定情焉生一子曰鶴真萬曆癸巳揮
淚而別

給銀買屍 宦遊紀聞正德時陝西靖寧朱進病死逾
二載同縣蘇氏有子卒越日忽甦熟視左右曰此非
吾家吾乃朱進也遂趨朱宅二氏訴于官斷令朱氏
給銀還蘇為買屍之資

走無常 語怪鄴都熊君言彼邑走無常者其人無病
忽擲跳仆地冥然如死或六時或竟日甚或越宿必
甦不復驚異也蓋冥府鬼吏不足則取諸人間令攝
鬼卒行其事訖即還

死胡索解 名世類苑毛吉破賊遇害或以擣軍餘銀
索付其家吉降神于僮悉索還之人謂其死不受餽
也詳見清介